

(إبراهيم مصطفى) (بطل العالم في المصارعة)

(إبراهيم يتحدث لهجة اسكندرية)

إبراهيم: (ينادي) يا سنية .. سنيه

سنه: أيوه ياسي إبراهيم .. أي خدمة

إبراهيم: لما بييجي سيدك عباس بيه ابقى قوليله إني مشيت واشكريه بالنيابة عني

سنه: انت واخذ شنطتك معاك

إبراهيم: أصل مش ناوي نقعدوا هناتاني

سنه: حد زعلك في حاجة؟

إبراهيم: تعبت من الأكل والمرعة وقلة الصنعة .. أنا مش واخذ على كده يا سنيه ..

أنا راجل ابن بلد كسيب وما أحبش أعيش عائلة على حد

سنه: بس سيدي عباس لو عرف انك مشيت هازعق لي اعمل معروف استناه

وبعدين امشي .. حاتقطعش عيشي الهي يستر

إبراهيم: يا سنيه الموضوع دي يخصني إني

سنه: اصله منبه علينا نراعي كل طلباتك وكأنك عايش في بيتك

إبراهيم: أنا مش واخذ أعيش في القصور يا سنيه .. أنا راجل فقير زيك ويمكن أقل

منك وكل ما في الموضوع شويه المصارعة اللي بالعجم

سنينه: اهه عم إدريس وصل يتصرف معاك

إدريس: السلام عليكم يا عمدة العضلات يا مصارع الوحوش

إبراهيم: أهلا يا إدريس

سنينه: يا سيدي الكابتن جهاز شنتته وعازيز يمشي

إدريس: الله ربي .. معقول الكلام ده .. يا ملك الأدغال .. انت عازيز سيدي عباس

يخلي اليوم بتاع الأنازي الوحش بتاع الأنا

إبراهيم: أرجوك يا إدريس . إني تعبان وزهقان . عازيز اخرج للشارع والناس أدور

على لقمة عيشي بنفسي .. أنا مش متعود حد يحط لي اللقمة في بقي بالشكل

ده

إدريس: عباس بيه راجل رياضي بيعحب الرياضيين وانت مصارع زي الحديد عازيز

الرعاية والهدمة النضيفة واللقمة المغذية .

إبراهيم: مش معقول أفضل قاعد كده يا إدريس أن أخذت بطولة الوزن بتاعي في

مصر وتقريبًا ماليش منافس ولسه راجع من الدورة الأولمبية في باريس

والدورة الثانية يا ترى من يعيش بعد أربع سنين

إدريس: والله أنا عبد المأمور .. يا كابتن إبراهيم .. وياريت تأجل موضوع المشي

بتاعك لغاية ما يرجع عباس بيه وتتصرف معاه

إبراهيم: وهو كذلك أنا كمان مارضاش حد يزعلكم بسببي

سنينه: هات الشنطة يا سي إبراهيم

إبراهيم: خدي الشنطة يا سنينه بس خليها مقفولة زي ماهيه

فصل

(صوت الشارع)

صوت رجالي: تاكسي (السيارة تتوقف ويدخل ويغلق بابها ورائه) من فضلك
شارع سليمان باشا

إبراهيم: حاضر يا فندم (محرك السيارة تنطلق ثم يدور هذا الحوار داخلها)
الصوت: أنا شفتك فين يا اسطى .. شفتك فين أنت وشك مش غريب عليه
خالص

إبراهيم: يخلق من الشبه أربعين

الصوت: هو اسم الكريم ايه ؟

إبراهيم: إبراهيم

الصوت: يبقى انت يا راجل أنا فاكرك كويس إبراهيم مصطفى بتاع المصارعة
إبراهيم: هو بعينه

الصوت: وايه اللى شغلك سواق تاكسي

إبراهيم: عمل شريف أحسن ما اعيش على حساب حد

الصوت: برافوا عليك . طول عمرك إنسان مكافح . من أيام الخواجه جريديان
الى في القباري وورشة النجارة اللى كنت بتشتغل فيها

إبراهيم: حضرتك عارف تاريخي كويس

الصوت: أصلي كنت ساكن جنبكم في القباري قبل ما اجي مصر . أنا باشتغل
مدرس ابتدائي

إبراهيم: أهلا وسهلا تشرفنا

الصوت: وازاي يا بني بعد ما بقيت بطل القطر المصري والرابع على مستوى العالم
ما يكنش عندك وظيفة محترمة تعمل لك دخل ثابت

إبراهيم: الحقيقة أنا لغاية أول امبارح بس كنت ماسك وظيفة لكن ما ستريحتش
لها

الصوت: وظيفة ايه يا ترى؟

إبراهيم: وظيفة عاطل .. أكل واشرب وأنام وأتمرن على حساب النيل عباس
حليم وفي قصره

الصوت: وحد يلاقي وظيفة زي دي!!

إبراهيم: أنا بقى لقيتها ورميتها . أنا راجل اتعودت أعرق وأشقى بالقرش اللى
اكسبه

الصوت: طب والمصارعة

إبراهيم: اديني باتمرن برضه لكن من غير اهتمام . مفيش منافسة تشجع الواحد

الصوت: يا ريتني باعرف ألعبها كنت نافستك (ضاحكًا)

إبراهيم: حضرتك عايز أي مطرح في شارع سليمان

الصوت: هنا كده في الأول .. متشكر قوي (صوت السيارة يتوقف) عايز كام

إبراهيم: لا مفيش فرق انت راجل بلدياتنا خليها علينا المره دي

الصوت: انت لو عملت كده مع كل زبون تعرفه يبقى مش هاتكسب ولا مليم هو
فيه حد ما يعرفكش

إبراهيم: الصيت ولا الغنى يا حضرة الأستاذ
الصوت: يا سيدي الصبر طيب وبكره تتدبر وتبقى عال وتحقق مرادك

فاصل

إبراهيم: الحمد لله من ساعة مادخلتي بيتي وأنا رزقي زايد والأشيا معدن
وعال العال

زوجته: يعني مبسوط يا سي إبراهيم

إبراهيم: لو اعرف كده كنت اتجوزت من عشر سنين

زوجته: كلامك الحلو ده هيخليني اخد قلم في نفسي

إبراهيم: خدي دسته أقلام من حقك

الزوجة: طب تحب اعملك ايه النهارده على الغدا

إبراهيم: بمناسبة الغدا انا كان اسمى زمان وأنا صغير أبو طحال (ضاحكًا) طبعا
انت مستغربه من الاسم ده

الزوجة: أبو طحال زي أبو جلمبو

إبراهيم: أبو جلمبو في البحر لكن أبو طحال في المسمط أصلي كنت احب الفشة
والكلاوي والطحال

الزوجة: خلاص يا أخويا الصبح أروح المديح أجيب لك فشة بحالها

إبراهيم: أنا فعلا محتاج الأكلة دي لأنني عندي ماتش مهم جدًا بعد بكره قصاد
إبراهيم صبح

الزوجة: نفسي يا اخويا أشوفك وانت بتكسر رقبة اللي بيلاعبك واقعد ازغرد
وازغرد

إبراهيم: ولو جيتي ولقيتني أنا باكل ضرب للصبح واللعب اللي قصادي لاوي
دراعي وغلبنى تعملي ايه

الزوجة: ارمي الملاية من فوقي وانزل أكل لك حته من فخده
إبراهيم: لا يبقى خليك في البيت أحسن نلاقي كل المصارعين من غير رجلين
(ضحك)

فاصل

مسيو بيانكي: «إيطالي» خبيبي أبو خليل انت عندك دماغ ناشف زي الحديد
إبراهيم: أظن يا مسيو بيانكي ما يرضكيش أكون لعب خايب وافتكر خييتي دي
هتكون في وشك لأنك مدرب الفريق

بيانكي: خبيبي انت واخذ تخدي مع زميل مصري زيتك تمام
إبراهيم: وماله دي منافسة شريفة والشاطر يمثل مصر

بيانكي: بس دي في وزن غير الوزن بتاع الانت

إبراهيم: أنا لما زهقت من وجودي لوحدي في وزن خفيف الثقيل كان لازم اطلع
لوزن الثقيل بقالي أربع سنين ملعبتش بحماس تقريباً من سنة ٢٤ وقت ما
رجعنا من دورة باريس

بيانكي: عظيم جدا إبراهيم صبح بطل الثقيل كسب الانتا مفيش برويلم انت ترجع
تلعب خفيف ثقيل وهو يلعب ثقيل

إبراهيم: كان لازم ارد اعتباري واكسبه

بيانكي: وكسبته خلاص . ورديت واخذ اعتبار

إبراهيم: قول رديت عشرين اعتبار وادينى قبلت السفر في وزن خفيف الثقيل بس
بمزاجي

بيانكي: المهم يا بطل ترد الاعتبار بتاع الانتا في دورة امستردام مع أبطال فازوا
عليك في باريس من أربعة سنة

إبراهيم: أنا حاططهم في دماغي لغاية دلوقت وبينى وبينهم تار جامد مستجرين
بطل السويد وبلليني قريبك الطلياني

بيانكي: لو تقدر تعمل مكسب كبير مع سويدي وإيطالي تضمن بطولة عالم

فاصل

إبراهيم: الف مبروك يا أبو سيد شرفتنا كلنا

سيد نصير: عقبالك يا ابو خليل

إبراهيم: ما عندكش فكرة أنا أول ما سمعت أنك كسبت الميدالية الذهب في رفع
الأنقال قلت لنفسى يا واد يا إبراهيم لازم نرجع مصر معنا أكثر من ميدالية
ذهب ولازم أكون زي أخويا سيد نصير عشان تبقى سنة ٢٨ سنة
الانتصارات لينا كلنا

سيد: عشان كده أنا عايزك تيجي تمرن معايا لغاية ما تلعب المباراة النهائية قدام
الداهية الألمانى الى اسمه ريجر

إبراهيم: تعرف يا أبو السيد ما خبيش عليك أنا بعد ما كسبت الإيطالي بلليني

حسبت إني كسبت البطولة أنا متفائل جدًا إن ربنا مش هيتخلى عني
سيد: ونعم بالله بس دلوقتي تروح تجيب حاجتك وتيجي تنام مكاني الأوضه
مليانه ورد وفيها ميدليتي الذهب
إبراهيم: معش ناقص غير أقرصك في ركبتك عشان احصلك في دروتك
(ضحكات)

سيد: لكن قولي الخواجة بيانكي عمل ايه بعد ما كسبت بلدياته الإيطالي
إبراهيم: الحقيقة الراجل قبل الماتش وصاني أكسره وقال لي دا شغل يا خبيبي لا فور
سيد: قد إيه الرياضة عظيمة

إبراهيم: طبعاً يا أبو سيد خلتنني شفنا بلاد وناس وأشكال وألوان
سيد: وخلتنا نرفع اسم بلدنا وعلمها لا خضر بنجومه وهلاله
إبراهيم: والدور على العبد لله ولو أن الراجل الألماني اللي هلاعبه داهية مش سهل
سيد: قول يا رب واعمل اللي عليك أنا بادخل على ديسك الحديد ما فكرش في أي
شي تاني غير الشيلة وبس وأقول يا قوي وارفع ألاقى الحديد بقى زي
الورقة في أيدي بأمر الله

إبراهيم: كله بأمر الله

فاصل

الزوجة: على الله يكون أكل عجبك يا سي إبراهيم نورت بيتك ومطرحك يا خويا
إبراهيم: الخير على قدوم الواردين يا وش السعد

الزوجة: رفعت راسنا . أنا بامشي في الحطة الناس عايزة تشيلني من الأرض شيل ما يصدقوا بس يعرفوا اني مرات البطل الى واخذ الميدالية الذهب

إبراهيم: أوعي تفتكري انها ذهب بصحيح دي قشرة (ضاحكا)

الزوجة: يا خويا ذهب ولا ألماظ انت سلامتك عندي بكنوز الدنيا

إبراهيم: عارفه يا صفية انا تعبت من الحفلات والمجاملات

الزوجة: معقوله يا خويا بقى حد يطول الأملة الى انت فيها

إبراهيم: انتي مراقي وشريكة عمري لازم تكوني فهماني أكثر من كده أنا مش كاره النعمة والعيشة الناعمة بس عايز دايما اتعب في لقمتي وأحس بكرامتي أنا مش عايز ابقى بطل عشان اليه الفولاني يعطف على ولا اليه العلاني يتفضل على

الزوجة: يا خويا والنبي فهماك بس نفسي تاخذ حظك من الدنيا وتعيش وتتمتع إبراهيم: (بتنهذ) أنا راجع من هولندا بقالي أسبوع لغاية دلوقت يمكن اول مرة اكل لقمة واستطعمها دلوقت عشان في بيتي

الزوجة: الهي يجبر بخاطرك قادر كريم كمات وكمان

إبراهيم: أنا باتكلم جد أكل جروبي والمطاعم الى نسمع عنها ما يسدش معانا زي أكل البيت

الزوجة: ألف هنا وشفا يا خويا مطرح ما يسري يمري (صمت) أقوم بقى أعملك الشاي

إبراهيم: (يتنهذ باسي) أيه كان نفسي الحفلات الى فيها اكل وشرب دي أطلع منها بحاجة تفنعي وتنفع بيتي اكل أيه وشاي أيه احنا عندنا ولاد عايزين نربيههم

الزوجة: يا خويا أهني مستورة والحمد لله

إبراهيم: مستقبل العيال شاغلني يا صفة

الزوجة: خليها على الله وهي تتدبر

إبراهيم: ونعم بالله

فاصل

(جرس أحد المكاتب يدق يسرع الساعي يدق باب مديره ليدخل)

المدير: ادخل

إبراهيم: أفندم يا سعادة البية

المدير: عارف يا سعادة الباشا الفراش اللي واقف قدام حضرتك دا يبقى مين

الصوت: مش واخذ بالي في الحقيقة

المدير: دا بطل العالم في المصارعة تصور بقى سعادتك هتشرب أحسن قهوة من

ايد بطل المصارعة

الضيف: على كذا الميداليات والكؤوس اللي في مكتب سعادتك بتاعته

المدير: قصد سعادتك كانت بتاعته بقى معقول الفراش يشيل كل الجوايز دي

والمدير بتاعه يقعد فاضي أظن الوضع محرج جدا

إبراهيم: (بغيط مكتوم) أوامرك يا سعادة البية ولا حضرتك جايني قدام الباشا

صديقك عشان تتشفى فيا

المدير: يا ابني أنا مش بتشفى فيك . أنا بس باعرفك حجمك عشان تعرف انت

مين؟ وابن مين لو طلعت أو نزلت أو اخدت مليون بطولة وعشان تعرف
تكلم أسياذك كويس

إبراهيم: لولا إني عندي أولاد عايز أربيهم كنت عرفت أخذ حقي

المدير: وبالمناسبة احنا كمان عشان ولادك بس بنخليك في وظيفة ميرى زي دي

الضيف: اتفضل انت يا أخ إبراهيم

المدير: هات لنا قهوة مطبوظ (سخرية) يا بطل أخضر

إبراهيم: حاضر يا سعادة البيه . بس يكون في علم سعادتك أن مش هاستمر في

الشغل والي يحصل يحصل

الضيف: أرجوك يا حافظ بيه تسمحلي بنقل الأخ إبراهيم لملعب البلدية أنا

محتاجه هناك

المدير: اديني فرصة أفكر

إبراهيم: (بغيط) فكر سعادتك على مهلك جدا ، أنا كنت باكسب باسم مصر

وبارفع علمها .. وباسم مصر أنا مش هاحقق كلاعب اكتر من اللى حققته .

ومع ذلك مهمتي اللى جاية أخلق جيل جديد يكسب ويكسب برضه باسم

مصر

«حسن الشاذلي»

نجم الفريق القومي والترسانة في كرة القدم

«أصوات مختلفة متداخلة»

محمود حسن: إيه يا شاذلي حضرت شنتك

الشاذلي: «ضاحكا» شنتي طول عمرها جاهزة / دي زي الحمامة/

الشاذلي: انت مستعجل على المرواح ولا إيه/

محمود: دول يا دوب يومين اجازة من المعسكر وبعد كده نوضب نفسنا عشان

نسافر على طوكيو « يقلد صوت الطائرة بفمه»

الشاذلي: قول بإذن الله / .. انت ناسي ان المدرب اليوغوسلافي لسه ه يختار

الناس الى هتسافر /

محمود: يا بني احنا ناس «استاندينج» في الفرقة..

الشاذلي: «ساخرا في حب» اوعى تكون فاكر نفسك ونج لفت بصحيح يا محمود يا

حسن / .. دا انت بيكتبوا لك عنوان الجون في ورقة عشان ما توهشي

« ضحكات»

محمود: طبعا يا سيدي لك حق تتريق في ماتش السودان جايب جون هنا وجون

هناك

مصطفى رياض: «متداخلا في الحديث» آه طبعا ومين يجيب اجوان غيره

محمود: مين هيحامي للشاذلي .. غير مصطفى رياض « ضحكات»